

Loron Internasionál bá Halakon Violénsia Hasoru Feto Sira

“Ho Kometimentu no Asaun Forte, Ita Hapára Violénsia Hasoru Feto Sira”

Diskursu husi S.E. Sr. Alfredo Pires

Sekretáriu Estadu Interinu ba Promosaun Igualdade

iha Abertura Kampaña Loron 16 Atvizmu Hasoru Violénsia Jéneru, iha Oecusse, 25 Novembru 2009

Na'i-Ulun sira mak hau respeita

Bainaka sira,

Señora no Señor sira

Hau haksolok tebes tán bele mai iha Oecusse iha loron ohin hodi hafahe hau nia hanoin ho imi kona-ba ida ne'e, Loron Internasionál bá Halakon Violénsia Hasoru Feto sira ninia aniversáriu bá dala 10 nian.

Loron spesiál ida ne'e mós tradizionalmente marka loron daluluk/primeiru dia hosi loron 16 hosi Atvizmu Hasoru Violénsia Jéneru, kampaña mundu tomak nian ida mak, hori tinan 1991, ho maneira konsistente lori ita nia atensaun bá problema violénsia bazéia bá jéneru, liu-liu violénsia hasoru feto sira. Mensajen sentrál husi kampaña bá tinan ida-idak nian maka katak direitu feto sira nian mak direitu ema nian (direitu umánu) no tanba ne'e naran violénsia ruma hasoru feto sira, ne'e sai violasaun bo'ot tebes hasoru direitu hirak ne'e.

Globalmente, iha aumentu iha rekoñesimentu katak violénsia hasoru feto sira sai impedimentu bo'ot ida iha dalan atu hodi alkansa igualdade jéneru no impedimentu bá sidadaun hotu-hotu atu hodi realiza sira nia direitu nudar ema nian hodi hetan seguransa, dignidade no respeito. Tuir CEDAW (Konvensaun kona-ba Halakon Forma Hotu-Hotu Diskriminasaun Hasoru Feto), ida ne'e forma ida ne'ebé extremu husi diskriminasaun.

Timor-Leste, hanesan mós ho nasaun sira seluk iha mundu, kontinua kombat problema kona-ba violénsia hasoru feto sira no ida ne'e bele haré'e iha nível hotu-hotu hosi ita nia sosiedade nian. Abuzu fíziku, sexuál, psikolójiku no ekonómiku, inklui mós violénsia ne'ebé relasiona ho barlake, abuzu hasoru labarik ki'ik oan sira, perseguisaun no violénsia relasiona no explotaasaun mosu hela dadauk iha ita nia família sira no iha comunidade tomak iha moris loron-loron nian.

Unidade bá Ema Vulnerável (VPU) husi Polisia Nasionál Timor-Leste (PNTL) nian nota tiha ona aumentu ida ne'ebé konstante iha número husi kazu violénsia doméstika nian iha tinan tolu ikus ne'e no oras ne'e violénsia doméstika konstitui kuaze metade hosi krime 817 ne'ebé relata iha tinan 2009 hanesan krime violénsia bazéia bá jéneru.

Infelizmente, maioria hosi insidente hirak ne'e ladauk relata tanbá mo'e ne'ebé asosia ho violénsia hanesan ne'e-ne'e no dezejju hosi vítima sira hodi nonok deit, kazadu/kaben-nain ho sira nia dependénsia ekonómika bá ema ne'ebé halo krime ne'e. Síkulu ida ne'e bele prova difísil hodi sobu.

Iha tinan 2009, tema bá kampaña nasional iha Timor-Leste maka “**Ho Kometimentu no Asaun Forte, Ita Hapára Violénsia hasoru Feto sira.**”

Hau haksolok tebes atu hato'o katak hahú iha tinan 2001, Sekretária Estadu ba Promosaun Igualdade (SEPI) kompromete tiha ona hodi implementa programa ida mak bele reforsa kapasidade nasional hodi koalio kona-ba violénsia bazéia bá jéneru. Lao hamutuk ho ONG sira, sosiedade sivíl no organizaasaun sira seluk, SEPI ativa tiha ona iha halao kampaña nasional sira, organiza oinsá halao

atividade sira hodi hasae konsiênsia pùblika kona-ba problema ne'e, nune'e mós hodi fó ênfaze bá iha prevensaun no provizaun ka fó apoiu atendimentu nian ne'ebé natón bá sobrevivente sira.

Realizasaun signifíkatívu ida iha tinan 2009 maka adopsaun Esbosu Lei Kontra Violênsia Doméstika husi Konsellu Ministru. Hein katak ho provizaun kona-ba Abrigu/Protesaun no Manutensaun, Lei ida ne'e sei bele debate ho lalais iha Parlamentu Nasionál.

Bele rekoñese katak sei la iha polítika ida deit mak marka fín ka rohan ida bá violênsia hasoru fetu sira. Aprosimasaun kompreensiva ida presiza duni atu ho maneira ne'ebé sistemátika koalia kona-ba ligasaun sira entre violênsia, diskriminasaun, dezenvolvimentu, direitu umánu no dame no seguransa.

Ho assistênsia hosi UNFPA, UNIFEM, UNMIT no Fundu Realizasaun MDG nian hosi Governu España foin lalais ne'e, SEPI suporta servisu hosi organizasaun sira hanesan Fokupers, PRADET Timor Lorosa'e no Programa Monitorizasaun bá Sistema Judisiál (JSMP) hodi fornese bá sobrevivente sira husi violênsia bazéia bá jéneru nian aimoruk assistênsia médika no ezaminasaun forensika, akonsellamentu bá trauma no informasaun kona-ba servisu legál nian. Bá oras ne'e dadauk, atendimentu sira ne'e básikamente bele hetan deit iha Díli no dezafíu bá Governu no ajênsia suporte nian sira maka atu habelar servisu/atendimentu hirak ne'e bá distritu sira, iha ne'ebé ita halo planu atu alkansa iha tempu ne'ebé tuirmai iha futuro ho assistênsia hosi Realizasaun Fundus MDG nian bá Jéneru. Fundus ida ne'e mós sei suporta planu kompreensívu ida bá treinu kona-ba violênsia bazéia bá jéneru no lejislasaun relevante iha fulan sira tuir mai bá membru sira hosi Unidade bá Ema Vulnerável sira (VPU) nian no polísia komunitária iha PNTL nia laran, ofisiál legál sira no judisiáriu.

Violênsia doméstika oras ne'e sai ona krime pùbliku ida. Ideia katak violênsia doméstika ne'e asustu privadu ida, ne'ebé mak bele hakotu deit liu hosi médiasaun iha odamatan sira ne'ebé taka-metin nia kotuk, ne'e mak ideia ida ne'ebé ho ideia ne'e nasaun barak, no laós deit Timor-Leste mak tenke hato'o/koalia. Ideia ne'e seidauk sai to'ok ideia ida ne'ebé importante tebes hodi reafirma ita nia kometimentu hodi bele iha efeitu bá mudansa iha atitude pesoál no husi ne'ebá bele lori bá transformasaun sosiál ne'ebé luan liu. Bele rekoñese katak, ida ne'e sei bele lori tinan barak atu alkansa. Bele mós katak sei la iha dezenvolvimentu ne'ebé sustentável no sei la iha dezenvolvimentu ne'ebé bele konsolida hamutuk anaunsér objetívu husi tipu violênsia ida ne'e nian alkansa tiha ona. Dame no seguransa hahú iha ita nia uma laran no hosi ne'ebá namkari bá esfera pùbliku tomak.

Hau fô bá ita bo'ot sira susesu iha ita bo'ot sira nia atividade sira bá Kampanha Loron 16 Kontra Violênsia Jéneru iha rai Oecusse ne'e.